

in tanta rerum copia ⁽¹⁾ deesse nemini argumenta possint, etsi alius alia sibi commemoranda proposuerit. Verum una mihi relicta erat, Tuarum, **CARDINALIS AMPLISSIME**, Patruique Tui laudum celebrandarum causa, eademque sicuti aliis Scriptoribus propemodum intacta, ita mihi, meisque Orientalibus propria & peculiaris.

Quid enim de singulis in Ecclesias Orientales collatis Pontificiæ munificentiae studiis dicam? Profecto nulli Orientalium populorum genti, amantissimi illius beneficentissimique Pontificis præclara liberalitatis ac benignitatis argumenta defuere: nullam is opportunitatem abire passus est, qua non communi Gentium omnium bono consuleret. In primis acceptum **CLEMENTI XII.** referunt Ægyptii atque Æthiopes, quos Coptos & Abissinos vocamus, quod illis ad Sanctæ Romanæ Ecclesiæ, omnium Ecclesiarum Matris ac Magistræ, gremium confugientibus, domicilii locum

(1) Singula Clementis XII. Pontificis vere maximi opera, ex ipsis Inscriptionum verbis quæ Romæ, quæque extra Urbem leguntur, habes apud Sandinum in Vitis Pontificum Rom. pag. 582. & apud Cl. V. Angelum Fabronium in Commentario de vita & rebus gestis ejusdem Pontificis a pag. 173. Vide Clarif. V. Marii Guarnacci Histor. Romanor. Pontificum, & S. R. E. Cardinal. Tom. 2. pag. 61. & 575.